

駢

儷

文

駢儷文目錄

關里 孔廣森 驛軒

卷一

賦二首

頌一首

摺子三首

呈文一首

書三首

札四首

卷二

序十二首

記二首

卷三

書後三首

論一首

連珠九首

誄二首

哀辭一首

祭文五首

駢儷文卷一

四極四和賦

維乾隆三十有六年恭遇

崇慶慈宣康惠敦和裕壽純禧恭懿皇太后八旬萬
壽慶典

皇上奉

安輿東巡狩試多士于方岳之下遂

莅軫乎闕里衍聖公

臣

昭煥命

臣

廣森爲獻壽之詩

九章被諸中和韶樂以臚輿歡罄虔祝

上顧而嘉之有

詔卽以前試題試

臣

廣森

臣

廣森時已入京師應禮

部試未獲躬奉

恩德聞

命感激謹用

欽授四極四和題目擬作賦一篇竭盡瑩瑩之思庶
備太平之謳詠

臣聞天之大數在于十二循明霸以成歲望閒衡以
列次匠人象而通門虞氏法而畫地乃若河圖坎離
奠居亦有洛書衡柱承區歛素曜于鮮方振青英于
大塗火撓長麗之羽水流不若之虛蒼龍見而沖虎

赤馬馳而對鼠漢闕峙其雙名周鼎著其履武咸旁
鉤乎四維以縱橫乎中五極者至也故分至爲時之
交極又中也故孟季爲仲之輔日集其辰四節和均
秋灰南呂夏管蕤賓天龍朔聚月駟東陳是風雨之
所會實和義之所殷玉衡旋左金樞轉右北杓鄰陽
德之宮西柄合攝提之首貞大威則巨蟹移躔建高
叢則鬱車入宿赤道平而銀箭均宵黃極遠而金徒
變漏盛德王其鄉貴神壇其緒靈威旣謝從以燁怒
汁光未迎先以招拒邠葦來寒陶萸往暑辨方正位
幹流錯行天元窮于析木人正起于登明薺甘芥苦

堊落芸榮金門律暖玉燭階平來風曰俊書雲必卿
於以順我時憲而光我化成仰惟今

皇帝首出虹流篤生華渚在重光之歲陽值亶安之
紀序仲秋圉壯吉日庚午年符乎出震時應乎執矩
昔素王之降紱聞帝車之南指今青史之吹銅見招
搖之北底歲月日時卯酉午子式金匱于六陽正璿
璣于四履是以覽乎青陽開動敷祥觀乎總章擎肅
頒常兆乎南郊長贏以昌禮乎北折富媪以臧則天
之運授地之方乘中建極負陰抱陽含五德而和會
躋九宇而壽康

赤嬰母賦

丙申之夏讀同年洪中書

榜

赤嬰母賦愛其詞致輒

復同作然正平賦是鳥寄其怨思僕旣無所託附諸
侔色揣稱詠物之體云爾

若乃蒼華代謝朱陽在天桃茵舊落榴火新然赤闌
曲亞朱綴方連珊瑚鈎捲火齊屏懸筠籠乍啟有鳥
疑仙生西土兮質異稟南方兮色鮮戢紅襟之采采
舞紺趾之躑躑似緋衣之纖縷若朱組之翩翩渥赭
之姿非擬竊丹之號仍傳啄沈李而輕脣不辨銜落
櫻而細嘴相妍然而棲之瓊宇貯以雕塲徘徊栢繡

迴眺題璇胭脂深井綺燭虛筵方聆宛轉未訴纏絲
吐禽言而舌銳學蠻語而吭圓呼晨顧影聲夜驚眠
紅豆相思之怨枯桑遠道之篇亦有雀來鄆戶鳥集
吳年鷺魚雅于茄下雁翁雜于池前莫不頡頏共色
毛羽同憐彼蜀道之素翎隴坻之黃翼尚未足以先
焉

武成頌

臣聞九乾垂象金精耀參伐之旗八索臚占雷豫習
行師之繇是以軒皇御籙先修赤水之征唐后垂裳
必輯青邱之暴亦有周宣薄伐近在太原殷武裒師

不踰荆楚而三年有賞易已象其成功千里來歸詩
尚歌其永久方之今日靡得而言焉欽惟

皇帝陛下秉武三曾抗稜八表銀麋拓地金虎開圖
建木以西鑿空萬里長榆而北列燧千城象載形方
規矩上黃麟之瑞銅街闕邸呼韓刑白馬之盟雲呂
十旬記里之車合軌鞮胥九譯茶幣之史同文幽遐
畢屆其梯航泰遠咸歸乎懷轡而禹功不到西流自
絕于朝宗梟性難馴東徙仍迷于革響乃有兩金川
者鼈令游魂犬猺餘孽化殊天外犯熒塞以稽誅俗
遠華中比夜郎而自大粵在卯辰之歲曾興戊己之

師宥以投戈許其載木

恩寬蠻社未封武觀之鯨鯢榮假分符俾禦危山之
魑魅而乃獍心反噬鴟義矯虔不格兩階之干自投
一面之網促浸土司索諾木負阻窺觐憑遐翻覆狝
蛇薦食屢及于鄰疆蠻觸爭漸連于內地趨拉土
司僧格桑瑩與駟比羆本羆生外順內違每泄駒支
之語高巢陞制擅詢句町之仇議者猶以天險不可
升鞭長莫能及轡野修戎之日亦緩前禽龕山合玉
之年非無後至文臣臆決請罷守于珠崖

哲后沈幾命洗兵于玉壘蓋以王鈇威遠睽矢勝殘

保大定功有征無戰三辰所照靡亭毒而或遺九伐
無私孰侂離而必討於是發軍城郭簡銳微盧闕虎
朝鋪人問沈黎之罪跼夜渡衆爭敵愾之功師出
一年月聞三捷僧格桑棄地而遁小金川全境以降
然而虎負嵎閒困猶思鬪鷹棲韝上飽卽背人此則
因壘之師所以勞其再駕渡瀘之役必將示以弋擒
者也

聖天子旻晷思賢綸書策將重鑿門之命寄專閫之
司爰以阿桂爲定西將軍營平受律羗罕料其成禽
裴相視師淮蔡聞而悸魄若乃隆衝弗弗旗鼓堂堂

朔簞燕弧韓章鵬幟索倫蹶張之卒吉林超距之徒
八旗試弁之倫六郡良家之子輶車百雉挾風隼以
駢驅箬矢三鑱怯雲雕而墜影庚鈴制勝九天九地
之兵甲帳懸符四正四奇之陣再平美諾一掃荒陬
繫彼妻孥降其部落月氏已死漆函傳飲器之頭徵
側爲俘驛騎致蠻銅之鼓唯是逆酋索諾木連雞失
勢知必及于

天誅鋌鹿已窮猶自恃其地利環山列柵背水施礮
奮螳臂以當輪網蝥絲而結衛羊腸西轉自回九折
之谿牛尾東來未鑿五丁之路雪凝陰坂經炎夏而

不消日遠陽關積漏天而生瘴我師長馳渠答直冒
槍雷指揮則屋瓦皆飛叱咤則丸泥失險危城折箸
械九設而九攻壯士乘墉布再懸而再斷文淵負羽
獨進壺頭士載裹瓊親踰劒閣遂以乾隆乙未八月
十五日破勒烏圍戈矛照月鸛鷺之隊彌雄旌旆生
風鳴驚之聲盡亂斯時也

天子方講藝螭幻修文虎觀咨儒官于劉向遣謁者
于陳農羽檄星馳疊下五申之令銅籤夜警仍披二
酉之編豈非天璽聰明

聖兼文武者與刮耳崖者軍道之矜喉賊居之窟穴

地稱巖邑山挺石林孝子望而旋車元侯行而東馬
六師并力五尺略通道古攻其東南亞夫備其西北
九重籌筆乃懸御于氐羌三帥宣猷更分功于卻范
狼弧氣肅曠弩先飛箕壁星高火輜具舉進攻黃寺
震讐其祆神屢獲殃徒係纍其母妹我氣方銳破竹
無頓刃之勞彼力益殫窾木有丁衝之急幕危燕散
鼎沸魚驚方陳縛主之求始請吠堯之罪今年二月
四日索諾木兄弟就禽治罔脅從誅無填服金城上
奏七朝達于長安都護飛書五日聞其吉語慈靈執
訊露版慶成比赤囊報至之時當

翠蓋巡行之地勛過獲嘉之改縣事同聞喜之名鄉
皇上展謁

兩陵奏膚

七廟靈臺上祭卽陳丹水之功畢郢升祠自兆素鱗
之慶善歸

聖母敬上

徽音奉

慈輦以豫遊遵翕河而裒對杏花菖葉兼省春耕茹
水芹宮式迎秋駕泰山玉策探瑞筭之無疆魯殿金
絲告武成之有截旣而赤融效職朱陸移躔襄城迴

訪道之

興巴徼振凱旋之旅條侯之屯細柳擐甲冑以來朝
耿弇之在臨淄降乘輿而親勞然後有事

宗

社大獻馘俘秋官請纓夏卿執鉞戒彼費留之賞廣
我通徹之封秬鬯青圭來召公于漢濟慈珩赤芾拜
方叔于新田李霍勛名咸開東第鄂褒毛髮並繪南
宮雅奏勤歸軍容譁扣玉關偃革紫塞銷兵鶴膝羊
頭仍入蘭錡之庫龍文驥子散歸仙掌之山雖復金
母環來樊侯鼎出冠軍絕幕刻石字于狼胥博望浮

槎控河源于牛渚未若殊鄰稟朔荒裔占風寶布時
供賦錢歲納冉驩邛笮交輸流沫之珍奇傑侏侏僑
疊聽提官之謳詠是則豐京王會列三臺于陰羽之
中洛水明堂朝九采于應門之外不假銜鉤之后載
十一征豈惟通譯之邊餘四萬里赫赫乎

至人之聲靈煌煌乎來許之盛美綜茲經緯可咸五
而登三勒之簡編將襲六而爲七者已

臣

廣森忝列

鵠行粗窺豹管聞西戎之耆定均慶于並天念東土
之瞻光感縈于私渥懷深睎尹語罄掄揚雖不工于
文章尚慚朱鷺鏡歌之作庶以載夫功德亦附白狼

槃木之餘謹獻頌曰

於鑠

上聖奄有下矩象寄柔逋龜沙卽敘奇幹善芳肅慎
文罟東漸日蝕西底月戶孰敢不庭膏我齊斧九姓
內藩廿年外侮蠹讐大邦侵擾西土邊吏上言

宸居赫怒秉節調牙發璋徵琥桓桓定西國之彊禦
總領戎旃師干甄部青叟從行白徒束伍有殲斯鷹
其矯如虎署道披圖指形聚黍裂彼右肩斷其脣輔
爾險何依爾遠何怙縫革衝礪叩籠飛炬破易撈體
動若摧腐羌豪帥醜刮耳是聚井底困蛙穴中竄鼠

五兩振威重山夷阻季母旣禽精夫亦虜我庭分犁
苗人安撫紅旗之捷奏

行在所讓德于

天告功于

祖大武承謨達孝纘緒吉蠲上

陵甘露有涓

瓊冊述徽

璫宮秩祐

安輦輦輿洪爐清籙般賚協周祈沈觀滬水若恬流
登祗順扈輯瑞岱宗陳風嫺渚淑問西庠祭菜東魯

展采崇今上儀稽古飲至策勛愷歌率舞青壇三陔
緹帷重組

嘉乃戰多慰我勞苦昔奏采薇今歌杕杜文相帷幄
武人樽俎榮以旂常申之袞黼形繪雲臺聲垂銅柱
天語龍轡雲章鳳舉紀迹峻崖勒崇膠序詞掩岐陽
典高岫嶺乃闢南端載升

展宁察案師師徹行楚楚右列作士左班祈父鴈奏
靈鼗鯨鏗猛虜僑榮染鐸尸禺鼙鼓兩觀既誅

重巽式溥復稅農疇緩租國庾化洽橫舍仁流園囿
廣青衿員散赭衣侶威肅春霆澤沛夏雨九塞清塵

四民安堵唐平蜀道周省淮浦尚誦昌黎猶詩吉甫
以今準往瑣瑣何數

天錫

皇帝神聖文武於千萬年爲億兆主

爲宗子撰摺子三道

襲封衍聖公

臣

孔昭煥奏爲恭謝

天恩事乾隆四十五年正月二十八日蒙

遣吏部尙書協辦大學士

臣

嵇璜祭告先師孔子禮

成欽惟我

皇上緝熙睿履化育書林述

祖德而南巡道光下武順

天行而東顧心切右文容簡從官祇承祀事吉圭奠

斚先人之饌鼎重新振玉和金舊宅之歌絲如在

臣

奉呼門之澤絕叩陛之因向日心傾瞻雲路遠謹繕

摺遣族長

臣

孔尚智等齎赴

行在叩謝

天恩仰祈

睿鑒謹奏

具官

臣

某爲代謝

天恩事據世襲五經博士

臣

東野崇鑄呈稱乾隆四

十五年正月二十九日蒙

皇上遣吏部尚書協辦大學士嵇璜祭告元聖周公
禮成欽惟我

皇上懋學閎書縣基郊鼎六聯敘職成均協教胄之
經九夏和聲時邁第柔神之頌契勤施于陝右新議
祠官况啓宇于侯東舊紆

宸顧疇咨橐從展案枚官仍雕之薦維虔燾廩之盛
有秩承休錄後軼建武之遺聞文憲虛崇陋祥符之
故事所有感激下忱理合呈請代奏等情到
臣臣謹
據呈繕摺代謝

天恩仰祈

睿鑒謹奏

具官

臣

某奏爲代謝

天恩事據世襲五經博士

臣

仲耀涵奉祀生任世本

同呈稱乾隆四十五年四月十八日蒙

皇上遣太常寺卿吳玉綸詣先賢仲子任子祠拈香

欽惟我

皇上道景堯羹治符舜節靈臺偃武農山之赤羽全
銷璧水宏文長坂之素風益勵茲值

觀民蒞浙旋軫猶河式數仞之官墻逮羣賢之祠宇

念仲氏禦侮吾道以爲重輕嘉楚產來遊學者莫之
先後特流

渙命並遣升香薦寶鼎以氛氲賁神叢而輝燭近
清塵三十里頻瞻俎豆之光遠闕里二千年尚食詩
書之報耀涵等均叨末裔共被榮施飲水有源戴山
知重所有感激蟻忱理合合詞呈請代奏等情到
臣謹據呈繕摺代謝

天恩仰祈

睿鑒謹奏

爲邑人呈請故知縣嚴君從祀名宦祠文

竊惟我

國家甄簡吏能澄釐祀族六廉考最優唱注于東銓
百郡營祠配循良于左坐所以生致其用沒報其功
布之秩官書之挈令故曲阜縣知縣陞任桃源同知
嚴君諱文典者清畏人知範爲士則導其胄牒寅輶
徵美俗之英敘其清資甲第上揆庭之藻下車讀法
條四戒于秦侯開戶恤孤酌一孟子于任叟協風春饁
輟駢避其敦蔭靈雨秋繩履畝寬其納秸宵流依火
競作醴管曉見天根卽成砉碣令行胥卒懸象赭以
銷頑名惕長官却牛黃而問直萊塵入甌史雲獨行

之賢棗蔭援街子產衆人之母由是賜杜詩之棗戟
特進勲銜望郭賀之檐帷就加容服渤海之焚繩待
理潁川之篠竹重迎旣增秩于丞卿仍牧毗于敝邑
及其借寇滿歲去魯有期邪谷一錢茨河兩馬簞壺
屬道耆幼攀轅東京銘酸棗之碑南部式甘棠之茇
是亦可謂所居民富所去民思者已昔朱卿舊德歸
祭桐鄉宋父遺靈分膳汝社況以嚴君忠信之長慈
惠之師休問光于汗青茂績卓于綰墨某等不勝大
願願採輿誦之聲協街彈之議申祈

朝命許列鄉禋永房棋之潛馨飾局泉之賁渥庶使

雁門樂府不孤咏于疇年鳬履神祠兼彰垂于後勸

上座主桐城姚大夫書

受業廣森再拜上言夫子大人座前去五月十七日
領到惠製儀鄭堂記一首如來鄴騎方窮寶玦之繩
恐效津龍遽化豐城之鐔雕陵顧字渙水騰文歡喜
奉持回還誦讀去天三尺未喻聲高繞極一句定知
塵起伏惟夫子大人立言不朽下筆爲經受書于河
洛之間講學于濂伊之表斟酌體要二百年吏部之
文含吐風神六一翁廬陵之集乃若子山宮體丁廡
小文固有類于俳優尚恥爲子執戟而廣森藉承談

末經示端倪以爲湘水波瀾稱言絕妙春旗楊柳無
字可刪旣舉斯隅自覽其切遂得粗知偶事強附駢
聲宅日韓陵片石免作驢鳴樊南一編積成獺祭誰
開閒介卽被雕朽耳矣蝸角荒廬蛇年草創東鄰縈
映顧慚拙宦之居北市囂塵差遠小人之宅然而方
纔布武廣不由旬在陸疑舟有肉似甗雖開府小園
何嘗無賦而長卿陋室未必堪銘豈意金壺副墨石
室餘縑錫以題辭光其案稅入長公別集彌榮三槐
之堂乞退之一言便擬雙松之舍竊惟校漢儒林東
京尚已稱鄉先達北海褒然是以小已忘涯高山仰

止低徊哲範若見之墻撫擬賢容欲圖之壁重聞命焉曰姑舍是賢者識大不當固以專家古之離經非徒尋夫章句許君謹案何掾膏肓雜問之志六藝之論詎要道之微言祇通人之鄙事若廣森者私淑于趙商張逸之閒激揚于賈釋孫評之後旁要夕桀僅取多能觝字曲聲惟資小學上士勤行之道本未朝聞羣經淆亂之言何曾晚定若其溯高密之徽風追不其之逸躅足使冀州畔援折敬伊人應劭宏通願爲弟子二千石青綬式駟馬以旌門百萬衆黃巾望單車而解甲世無孔子當亦游夏者流第之宋儒不

在張程以下是則慕藺相如之名其去猶遠讀臺孝
威之傳此志終狂苟將業彼箋疏呻其佔畢而謂著
書通德訓詁傳于此名寫定禮堂祝史尊其陳數匪
直鄭公之學謬爲聖證詆諆抑幾董傳之徒乃有步
舒惑陋與因荷言提歸諸盍各負墻無地迫牖何年
起安石于東山志今益遠望羲和于南陸心與俱馳
謹啟

與裴編修

謙

論篆第一書

三月十四日廣森白竊惟足下從學甚博向古甚殷
輒以僕爲知書欲從僕而受篆猶恐好事有侯芭之

客問字無揚雄之奇誤偶山筋謬談水骨不足以副
厚期承下問昔者論語有訓餘力則以學文昌黎所
言爲文宜略識字固非識其點畫學其偏傍而已必
將探六義之根源審八體之因造蠱蟲在皿通于易
爻閏王居門合彼官禮六身二首知絳縣之年兩縱
三橫笑李彪之對蓋自雲陽御史上谷仙人始湮門
左之傳浸起廷中之議席閒加帶鼓外安皮黃頭著
于晉謠白水稱于漢識皋鐫羊下將軍所以興言長
說馬頭祭酒爲之扼腕又况獻義姿媚虞褚流傳陳
列車傍追改六弢之字頗諧義讀矣更九範之文者

乎亦有京兆好奇山陰造字效形蝌斗幻象鳥蟲仿
款識于尸臣託盤銘于王子魏經石壁邯鄲見而自
忘楚篆絲編僧虔發而強辨雖復居今稽古蓋亦離
方遁圓筆少銳則以爲懸針墨微濃則又稱垂露是
豈所謂曾元隸艸穀穀冰斯者矣從俗則沿譌日甚
僞古則瑰異非經故學必以小篆爲宗義必以說文
爲斷僕謂足下宜尋五百卅之部按九千餘之文別
類離倫同條共貫叅錯鉉之義疏以定其是否審顧
陸之徵引以校其異同然後諧聲合三代之音解故
軼九師之訓匪云小學足資博聞且今之說文則非

汝南手跡今之小篆亦非上蔡舊章凡從及二寧取
左垂言是口辛何須上曲至若本本別用醋酢倒施
賡卽續之重文全乃全之或體旣古今錯互篆楷乖
違捨訓解奚以知非質確莫能曉况夫別風淮雨良
刊本所易訛魚魯銀根詎茲編而獨免若不求指事
會意之說強欲記刻符摹印之形將恐乏非反正虫
乃屈中不悟三豕之非遂有十宗之陋爾不然說文
旣非干祿之書小篆又無記名之用何必封題蛻頰
柿葉餘青坐對井闌魚鱗盡墨窮不可盡之功昧所
以然之理僕且以爲不當爾也惟足下裁察

與裴編修論篆第二書

爲說者曰篆畫貴細篆體欲長引脚叅停結搆勻整是肖其形而未究其理悅于目而未得于心也夫隸有隱鋒楷有撥鐙字雖殊體理宜共科昔賢喻以金刀方諸玉筋螭匾之法故爲垂頭釵股之形亦取豐末或注墨外引或隨筆內投或蓄力倨句或赴勢波折一輕一重向背生焉若斷若續起止形焉是以蔡邕著說濃末微本皇象寫碑平上銳下譬晉楚之劍遞相詭反環燕之態自別纖穠而異曲同工殊輪合軌若云張而不弛環之無端雖古人所不能已抑古

人所不爲已至有翦其龜頰稿以荻灰手不應心乃
聽命于犀植臂非使指又假力于魚膠雖復平直方
圓程圭准黍頤其楮毫烟墨振采失鮮尚足語舒雲
結霧之工絕岸頽峯之妙哉今徒見繹碣之僞文執
陽冰之槁簡以爲斯翁墨妙小生筆精豈知棗木重
傳苗茨再刻跡已陳于芻狗神全失于畫龍空具匡
當寧堪楷則其惟石鼓庶有遺型修短得中縱橫合
度勁者山立柔者禾垂行若奔雲止若據槁若規三
維若矩四方一字之內左右相生一簡之中稀疏適
歷固當遠超二李近軼兩徐者矣方其握麝搗毫操

觚染翰外必懸挈內斯正心杼軸裕于機先鉤繩溢
于行表然後指擣在手裁制因衷亦猶禦寇轡弧試
復沓于杯水郵良執靶任罄控于鵠行篆之藝能於
是乎在署蒼龍之闕索月覃思對白鴿之書兼辰不
去古人於此亦云難也廣森頓首

上父執梁山舟侍講札

仰紆椽筆俯賜楹題遙蒙七字之褒愧荷百朋之錫
廣森問奇有志鴛鴦十回執轡無因龍門萬丈輒用
裝之玳瑁軸以琉璃馳賞墨林重齊紈之價懸輝璽
壁知蜀素之珍謹謝

與同年林編修

謝蕃札

承惠永樂大典護葉紙故府珍收前朝舊製比澄心
于宋紙殊鏡面于吳箋杜武庫之蜜香初分

帝賜張茂先之側理遂惠臣家染墨匪輕捧翰知重
謹謝

答同年洪員外

朴札

前件備貫珠慚輕升越但以皆頭寵秩列西火之
官昆脚新資從大夫之後庶委垂助飾浣濯宏廉豈
謂固辭忽堪踐禮永詩人之好是所愧于投瓊附君
子之交終相期于贈紵

謝人代撰詩札

足下才高倚馬價重雕龍范岫之管一雙江淹之錦
數尺僕略解蕪吟其如拙速自觀藻咏兼切欽遲輒
復乞餘潤于懸河分末光于鑿壁孔璋多事亦代裁
書安國少文居然賦几所幸謬同瓊瑛竊向秀之縹
緗猶恐易辨淄澠怵陸機之杼軸謹謝

駢儷文卷二

戴氏遺書總序

東原先生姓戴氏諱震徽州休寧人也學于古訓言行可法以薦徵爲四庫全書纂修

賜官庶吉士春秋五十有五乾隆丁酉五月二十七日疾卒凡所著文章經義若干卷叔父農部公先生之昏因也綴而刻之廣森嘗聞先生緒論又感先生崇聞漢儒而不終其志以歿乃爲序曰

緬惟樂遊講藝訪太傅于石渠元日談經坐侍中于重席時則玉羊旣遠金虎初開著學官者凡十四家

說稽古者成數萬字至若五是六沴之徵定君陽武
三科七缺之法弊獄淮南士苟通經皆能致用蓋原
其授受本屬參商敘其世年未睽昌闕是以祖之前
師沿之後葉北方戎馬不能屏視月之儒南國浮屠
不能改經天之義夫學有優劣者時也經有顯晦者
數也五君晚出非漢博士之傳千禩相仍廢鄭司農
之注縱橫異說別創先天顛倒聖文悉更後定特以
腐儒炫視易謬驪黃末士明經原求青紫但遵甲令
粗知帖括之辭疇克庚言紹彼先民之作敏而好學
信而好古唯於戴君見之已君以梅姚售僞孔蔡謬

悠矣云壁下之書猥有杭頭之字古文一卷祇出西
州小序百篇舊名北斗正謨攝詰歷黃序而僅存月
采豐刑邁赤眉而已燼乃或誤援伊訓滋元年正月
之疑強執周官推五服一朝之解譬之爭年鄭市本
自兩非議瓜驪山良無一是是用翦除假託折衷羣
淆步驟五三錄目四七爲尙書義考未成成堯典一
卷又以要聞五際尚論四家毛傳孤行是觴源于牟
妙鄭箋破字每毫采于轅嬰莫不假聲注文以意逆
志誠古訓之所式多識之所資也雖其篇冠以序擇
焉不精或云托諸西河或云造諸東海然嗣衿貽玖

何必欲色之音交扈羅鴛實爲陳古之刺爲毛鄭詩
考正四卷別爲詩補傳未成成周南召南二卷君之
入書局也西京容史夙善徐生東觀中文遂分淹禮
乃取忠甫識誤德明釋文殫求豕亥之差期復鴻都
之舊互相參檢頗有整齊削康成長衍之條退喪服
厠經之傳爲儀禮正誤一卷鄭斤粵鑄之篇備遺事
職穹蓋星弓之數首列巾車九經九緯營國有方五
溝五涂奠水有則尋筵旣度遂知洛邑之朝圭縶未
縣孰辨營邱之夕以至肆懸舞扇五等琮璜槐里樽
空椎成劒沒大夫嫁女之器未必皆眞單于賄漢之

銘何嘗盡僞謚鎰之所畫績梁聶之所更釐不有參
稽將無競爽爲考工記圖二卷古者冕服以祭弁服
以朝祭則衣純朝則衣布帅形連帶制異于直方履
色從裳次分子績繡周壇饗帝大裘降繁露之華魯
禘嫌王旒璫飾丹雘之祝等威昭焉文質備焉道學
起而儒林衰性理興而曲臺絕齊秦委武莫識稱名
殷夏圖章焉能考摭溯增冰于積水示祭海于先河
爲學禮篇一卷冠其文集十卷之首且夫一陰一陽
之爲道見仁見智之爲性通于六籍之爲學辨于萬
事之爲理謂理具靈臺則師智者得謂學遺象罔則

悟寂者先豈有略窺語錄便詡知天解斥陽明卽稱
希聖信洛黨之盡善疑孟氏之未醇其說空空其見
小小蓋繹鄭君生質之訓誦周雅教木之箋所謂受
中自天秉彝攸好孔提可按漢學非譌爲原善一卷
孟子字義疏證三卷大學中庸補注各一卷君之學
術此其大端歟景純有云爾雅者九流之津涉六藝
之鈐鍵虎闥小學未束髮而知書豹鼠奇編不下席
而觀古故辨言之樂對于三朝首基之文問于五始
至于殊方別語絕代離詞皆轉注之指歸亦凡將之
墜緒爲爾雅文字考十卷方言考證十三卷書教有

六最夥諧聲叔重無雙唯傳解字若乃部分平仄母
別見溪官家恨狹羊戎之所自爲天子聖哲梁武之
所不信古人韻緩止屬椎輪後世音繁實精引墨君
審其清濁導以源流旁通反紐發韻約之舊聞上協
詩騷採顧江之新義爲聲韻考四卷聲類表十卷先生
文集尚有轉語二十章及六書論三卷自序此二種遺稿未見于是辨韻之餘留觀
百氏研音之下雅愛三閭以爲娥臺訪女近窈窕之
遺聲湘水舉芳續榛苓之逸響叔師注而未詳辨招
附而不可核之漢志名從主人爲屈原賦注四卷自
疇人分散鄒大失居九章中落昧商高積矩之言八

線西來竊保氏旁要之算而耳聽下士穴見小儒不知五五之開方輒薄九九之賤技哨壺斗五律管徑三元晦以之存疑季通以之強說未知紀步何能讀宅柳之經未曉倨句何能治上輿之記爲九章補圖一卷原象一卷古歷考二卷歷問二卷昔趙商難禮先求五服之方景伯受詩卽涉七州之地君山川能說郡縣成圖酈元故籍證其繇禠崑渤今流條其絡脈爲戴氏水經注四十卷水地記一卷直隸河渠書六十四卷嗚呼君之著書可謂博矣君之見道可謂深矣向使壽之以年行其所志下安輪于都尉授梯

几于鴻臚雍宮未建命曹褒以定儀大予將成詔宋
登而持節雖復辨卿訟闕公羊未必能明子駿移書
逸禮難其置立而太山郡將北面稱師上蔡通侯西
行受業則何湯旣貴輜車方賜于五更君上從遊錄
牒庶多于萬計豈謂陰堂告褻圓石鐫名一經之寫
定無年三歲之瓊瑰已夢清明卷佚長封下馬之陵
通德人亾不待嗟蛇之歲然而太元覆瓿終遇桓譚
都養陳謨彌尊伏勝鄭鄉絕學倘千百載而重興戴
氏遺書於十三經其有補悲懷逝者延佇將來

王氏醫治序

語曰若金在鎔惟治者之所鑄貢云三品見情之列
居前國有六工築氏之齊執下所以激沈清濁甄類
苦良蓋吏之有課史之有評詩之有品書之有斷方
諸大治厥義惟鈞則我更生王君於是有醫治之作
言夫鵠居既遠鯢壽斯希四節潛乖于冥造之初六
鑿相攘于徹昀之後雖復桃弧春射天札猶多荆盾
秋毆歟噫詎少由是權輿百草赭鞭奉軒后之威消
息三停素女發明堂之訣入靈蘭之室卽受奇肱過
長桑之舍方聞禁要冰臺三歲鋌刺九名乞錄籍于
開陽駐頽暉于連石是以刑臣西上降綸玉而求方

世子南征解綦瑜而採藥然而青囊委蛻卷軼丙丁
元晏淪湮經虛甲乙自餘楚賦鮮稱九折之良不遇
涪翁孰曉六微之技昔之視垣一方見心六孔長兄
察色仲子覘豪裏紺知生茲青知劇龍門濁浸回通
關蟄之經餘穴澄源內合支蘭之藏豈有循雞轉急
握虎翻舒狀榆落而非真期韭英而罔驗帷中十指
曾迷婦寺之殊壺子三淵不辨權衡之氣斯診脈者
失也遙傳帝問僅九雀于茅蒐閒採軍謠拯河魚于
麥鞠黃環赤箭未錄桐君漆葉青麴略存樊氏而或
倍偏枯之餌倖瞋眈之瘳壹蜚母以爲君謂烏頭而

可帝必致以熱益熱以寒增寒心識分銖非其能事
治蠲湯液去之愈遠斯處劑者失也將謂上商少羽
會于六六之紀欽徵加宮判于五五之性則七元詭
歷孰司天其可憑八谿蘊深譬迎雲而未極相如瘠
病非皆艷作之時杵臼痰痞何必容平之月玉機旦
讀祗亦空文金匱年荒已爲陳迹循環齡素石溜仍
疎俯仰鉛黃膠飴莫效斯泥古者失也晚有完素嗣
以義烏損陽益陰墜離升坎廢溫中之味先寫下之
法五分之熨奚施百灌之寒垂殆嗟乎春燠者生之
徒秋淒者殺之令故楊泉有言道家尚冷醫家尚溫

今輒反之使升明火化絕干君主之官洒淅陰淫客
于奇恒之府懸方肘後安望延齡納斧胸中將無伐
性斯見偏者失也王君仁者愛人學焉先覺自垂絳
鬢厭窺中古之書早悟華琳似飲上池之水若乃萬
金良藥九部奇經審吮咀于毫釐候樞闔于尺寸經
過濟北便識才人留滯交南倘逢仙令廣義媚之術
秘欲託嬰巢拾長沙之仆漏宣明孫絡徵其治案已
驚掛虺之車推其神工應寤援熊之夢且復濡烟櫛
井比事芝函岐區復逆之詞和緩春秋之策意專信
史之傳俞矯寓言之篇以及歲稽四失周官之所殿

月爲千軸梁皇之所嗤靡弗收羅於此法戒品題備
適流別洞該者矣猶恐末士膚受攻乎異端襲高陽
之紕紛昧河間之結滯死如可作疑懷躍冶之鳴生
不同時尚有載金之悔是則辯圓何窮狂泉不竭存
其正論質諸古人

先外舅詩集序

外舅芑孫先生姓沈氏名世燕浙江仁和人祖諱
元滄仕文昌縣知縣本姓徐氏以寧魏之親引芑卽
之義遂自懸榻之裔爲後織簾之宗考諱心養素家
園削青藝苑有孝友烝烝之行鄉黨恂恂之聲焉故

按察使廷芳公則先生之叔父也先生青雲稟器皎月裁襟驂篠之餘能談顧兔讓梨之下卽辨家禽及左類觀旂東練鼓篋是惟司馬探稽之歲士衡述藻之年旣而西旅底平

南巡祥習太清賦上記延恩之甌函刻漏銘成旌佐公之束帛特以龍門箭綏鴟路風危季子之裘幾窮于敝縷公孫之策屢下于有司尋邁挺解之憂頗類思貞之疾壯心已挫負四射于蓬弧利器仍存淬一割于鉛刃遂以縣丞試用河南省久之借補武陟縣典史心存濟物守慎持廉佩犢宣風令長資其翊贊

破雞讞訟豪黠畏其神明然而斗米折腰抱關託跡
充階逸駿悲鳴伏阜之前鬱澗長松永覆莖苗之下
綰黃綸于賤吏每益牢愁倦青骨于風塵不堪煩劇
南昌梅尉空蟬蛻以儀仙六安桓丞竟鴻漸而鍛羽
春秋四十以乾隆戊子六月三日卒官嗟乎與善無
徵餘殃有再男昏女嫁公明不見于生前玉隕蘭凋
通子又亾于身後向期多感知棟宇之蕭條王粲不
逢孰琴書之付託所遭若此可勝愴哉先生少遊齊
魯晚踐嵩邱授簡抽思是細侯之八詠登高作賦有
大夫之九能固已馳驟杜李斧藻陰何清詞溢乎縹

緇瑰句盈乎卷軸山梁徂謝著作飄零今之所存百
不逮一廣森弱齡一見謬託附于蘿絲異地十年遂
長睽于松嶠每開遺帙泣爾生哀欲覩全編邈然莫
自發閨中之藏篋訪日下之舊游僅得詩若干首張
卿並世或譏白鳳之書左賦他年將貴青童之紙恐
就湮沒綴而集之集錄如左

張舍人

墳

熱河集序

昔嚴夫子有言經有五涉其四州有九遊其八猶以
聽覽所及不踰白阜之封吟翰所被未罄黃坤之域
亦有落梅驄馬迢遙隴上之章低草牛羊敕勒軍中

之句錢歌白鼻樂府黃塵過青冢而怨琵琶弭白檀
而思鞞鼓莫不叩響風疎聯解雲委然而悲笳九月
塞草前衰橫笛三臺關柳易折羈寄之情長感慨之
興短噍殺之音多藻續之詞少也瘦銅舍人負沈宋
之才淳常楊之職紫荷奉橐紅藥當階曉趨丹屏夕
拜青瑣直鸞闈而端牘對雞樹而流唱固嘗倚馬七
紙握蛇百篇人誦穆如之風世傳蔚爾之文矣熱河
者神明界局地貳陪京里其道路既遠百郡之外奠
其邑居仍當五都之勝

國家陋甘泉于漢氏侈仁壽于隋年以爲堯皇遊豫

必作宮子成陽周王考卜亦朝步于豐水每中郢履
節清明告風乃睠北顧此焉清暑時則舍人滿歲灌
謁往覲爰閭考旦首塗兼辰戒道房雲在空箕風動
衣天日姓晏宙宇越朗仰矚

宸居之麗俯察區陬之廓得不揄揚舞咏舐和烟墨
者乎若乃層巘隱天長波帶地黃靈訪道之山翠嫵
沈玉之渚舍人極覽津委旁綠載牒徵鮑邱之湮流
問濡水之故瀆博望之槎萬里探析崑源太沖之賦
三都參稽方志是則縹囊一咏卽注桑欽之經墨林
五言可備闕駟之記且夫捎雲之簪半柯自奇衡霜

之松寸莖斯見讀是編者其可以知舍人之詩也已

閩秀王薇玉玉珍集序

昔靜女之三章取彤管焉被壽人于笙磬非無都荔
之詞列縟宿于羲娥不廢葦杭之怨葛山少婦執越
布以歌勞柘館貞嬪裂齊紈而歎逝書之硯北盡金
屋之奇才選入江東卽玉臺之新詠女子善懷香奩
尚已則有通華胄望淑慎閨儀南國新人東家舊姓
十三織素二七裁衣漱潤藝于瓜年剡芳名于茗玉
長言婉婉女師德象之篇好句流連吉甫清風之誦
前身蓮葉不踐陳泥他日椒花必多新製况復鴛鴦

左顧孔雀南飛歸小婦之高堂調絃錦瑟識上頭之
夫婿絡轡青絲鑪熏夕而共香鏡照晨而同影司空
博物本兒女之多情內史工書作夫人之弟子斯又
王郎天壤愧此多能居士桑榆羨其嘉耦者也若夫
紅羅帳掩朱鳥窗開初成墮馬之粧自服游龍之彩
繡餘茜萋倦卽停鍼製就茱萸織常當戶莫不語緣
情靡感與候遷牙管一雙金缸二等雪凝謝苑擬飛
絮于風前日出秦樓歌條桑于陌上至如雙聲讀曲
十索名題陽羨新茶紬書鬪罷南安早栗故事疏來
香沈水而郎歌蘭懸絲而妾和西陵松柏便結同心

北地焉支彌增善睐香囊叩叩是繁掾之定情雜佩
珊珊有鄭姬之警夜奚止爲歡玉女爭投百箭之驍
射雉珠臯始見三年之笑又如草生南浦梅下西洲
贈子將離呼卿小別菰藍盈羽指五日以爲期蕭艾
懷人比三秋而更遠遺簪紹繚破鏡連環書檢六張
文周四角蘭成集上曾裁寄婦之書徐淑詩中不少
望夫之什亦或少君歸里對挽鹿車侯光去吳仍借
鴻婦漢水之平塗七百江陵之遠道千三春嶂青螺
來發雙蛾之色秋波白鷺迴成九曲之珠是則七邑
東征曹家善賦百泉舟楫衛女寫憂抑亦詩發乎情

情生于文者與然而蓉生江上杏倚雲邊未免牢愁
誰能理遣重以諸姬適邛永歎肥泉季娣歸鄆先零
弱歲芝焚易感蕙質何堪幾日飛龍祗愁藥店數聲
別鵲忽上琴絲簾塵則榻冷琉璃吟筆則牀空翡翠
左思嬌女能無失母之悲班固佳甥應有問神之作
於是子荆改服文度多傷求故劔于箱簾綴遺翰于
鏡檻紅桃麗字遂書河北之箋白蠟妍辭徧識閨中
之媛而或者謂結璘有藥弄玉疑仙三髻雲鬟蓬壺
已隔層波羅襪洛浦仍逢倘作異聞傳諸好事則綢
繆贈答將皆戴勝之瑤觴宛轉聲音盡入彩鸞之唐

韻

薇玉小傳云此後託此仙致寄外八絕自言尸解仙去居切利東宮掌上界書三百架

岐陽宮詞序

蓋麗以則者詞人之賦也安以樂者治世之音也操
暢遷移比興墜缺江南七弄艷體漸多河滿一聲宮
詞斯尚故若芙蓉掌上記其所聞花藥宮中書其所
見源流數代涇渭諸家競秋士之妍聲接冬郎之繁
韻或稽載以歌其事或憑虛以致其情近自羸劉皆
有題目已上及夕陽幽館朝走岐原妹自天來姑爲
姬耦銀環進退盈內御于九官琮屢將迎重京嬪于
三媵顧茲陰教獨少陽春言其盛也則有征星敘御

滿月專房綠黃靜其裳衣莞簟和其上下春禰候燕
壇前禮帶羈之妃冬聘占熊戶左侍持銅之史繅三
盆手降貝組而親蠶詔六宮人肅珈衡而獻種於其
衰也遂有穆天子之荒哀淑人之寵閭妻臬哲越女
蟲飛哭漢水之膠船雙沈鵲扇笑驪山之烽火一敗
龍滌然復曉脫瑤簪永巷悟庭燎之后晏鳴玉佩應
門本衽席之詩似此徽音未遙姜媚如傳雅咏便繼
周南何必綠篋赫蹏刺椒塗之燕尾絳紗繫臂摹竹
戶之羊車北朝則續命琵琶小憐粉鏡南帝則衣塵
皂焚井辱膾脂方靡濫于鉛華足流連于綈墨者哉

雖或世隔千齡時更九古素成冊爛赤管篇湮而月
紀循環尚見周官之注文家姪娣略存何掾之言三
翟素沙非無服志九龍重壁亦有宮名猶殊夏上三
嬪止荒唐于山海虞釐二女久寂寞于瀉湘是以思
西方之美人徵北宮之故事體裁絕句得首若干倘
有韋母門人粗通內宰鄭公婢子厭讀中泥謬尋架
屋之文輒擬由房之曲將謂少君帳裏衝瑀如聞不
準書中壺牀在望矣

壬辰九月陶然亭宴集序

歲旅執徐日躔天蝸辛卯同年進士會于城西之陶

然亭時則令節初過積陰乍霽躡足層閣極目平原
黃鞠散蕊丹楓若瓊南窗面城西檻列岫桃簟旣敷
松醪更酌鈎覆以爲觴政壺奕以佐清談蓋稱一時
之盛竟日之樂也嗟乎一同覓詠再變暄萋舊雨已
睽晨星易落江南風雪地下參商或思越以歸來有
報羅而大去觥籌左右今茲曲水之歡車馬東西他
日渭雲之感能無雅唱尚望繼聲僕學遜懷蛟名陪
題雁不工韻語謬備序言但披滕王閣之文鰲年終
愧倘比金谷園之罰斗酒奚辭

丁酉八月陶然亭宴集序

陶然亭者都中士大夫比之周侯藉卉之地右軍修
禊之所或逢美日則重席相邀將有遠行則百壺出
祖僕至者屢矣然其事無稱爾若乃主人望重新封
燕頤之侯賓客聲華將應鯤濱之運今日之會是爲
盛歟通政王公被雍驚之表儀歷附蟬之清秩昔九
隆不諛六士龍行終童請甌越之纓介子奮樓蘭之
志高平第一聚米成山草奏盈千以鞍爲几入陪玉
帳出贊金弢會借箸以成勞遂磨盾而書捷嘉河西
之記室每問班彪爲淮右之銘辭無過韓愈于是從
軍詩出盡識公孫絕幕歸來仍多掛客粵以在丁之

歲中卯之辰載酒來遊朋舊式宴斯時也漢興廉孝
之科周上賢能之籍澤雲西北瑞我玉京竹箭東南
萃斯瑤席蓋與會者五十餘人而應試者居大半焉
他日一枝木桂半鏡芙蓉鮪渚同辭豹文共蔚則西
園圖記可當千佛之經東塔聞聲且續重陽之飲庶
幾賢主以爲美談

送同年洪員外朴督學湖北序

若夫兩重之眊八尺之竹雙騶稱妮擁油碧以前行
三組垂腰懷銀黃而載道衆人以爲君榮豈君之所
以自待者哉方敦牂紀歲呦鹿賓賢君以右棘之資

奉南荆之使校文數千見士七十籠中良藥並貯獲
荅座上佳材咸歸竹箭是則丹臺懸鏡青睞爲衡無
偏無頗必誠必信君之所以自待僕亦信于君者素
已雖然仲由去魯朋友乞言士會違秦大夫贈策素
人適楚僕宜有辭古者論秀于鄉設序于術祈樂已
入齒餘子于下庠緯耒將興坐父師于左塾其後四
科舉孝百郡興廉野行街室之彈朝重端門之覆故
有弦歌瓠葉飲射桑弧令長乘驢則山陰聚市童年
牧豕則廬下聽經莫不學有師承範爲士則三代以
降兩京稱盛焉

國家建立校官分行使者出疆一命坐領百城所以
宏獎書林整齊流尚其寵彌至其任彌重今之學者
襲爲至易之技工爲無用之言以詩書作地芥之媒
比文章于芻狗之具治禮記者喪刪其簡習春秋者
傳束之閣至于四書之外八比之餘授本不通其讀
稱文罔識其訓不信班史乃傳韋賢直謂鄴都會無
王粲雖若紫陽講舍白鹿精廬鄉老爲師貴游受業
而教不原于經言不則于古漫云進士賦孤竹而未
知亦有侍中問移監而莫對又况十室之邑一孔之
生目不接于耆儒耳不聞于碩議墨程積卷茶首爲

期烏足語鄭賈之箋疏董劉之經義也將使儒書誦
習雅術修明遊青領于環林化緇紳于槃拜潁川文
學能爲執俎之容蜀郡茂才解唱中和之樂以至樵
夫談道幹吏佔經戶識廉隅家知禮讓然後六行之
儒以道得民再適之選以賢馭貴上不負

天子樹人之意下不失先師建善之風其當于君有
厚望也與

林母廖太安人八十壽序

若夫青女飛霜東海見浮筠之竹素祗凝雪西崑有
覆陞之松凌寒燠以孤存貫榮枯而一致賢婦於以

比德載牒謂之美談者已亦有氣合青萍延津忽墜
暢終緣綺珥約先危廣陵三尺之孤彭澤九齡之子
義方之訓遂隔南喬琢器之規方資左塾而問公超
之市十脰爲艱拜通德之門一囊已罄以云教子抑
又難焉侯官林母廖太安人北郭仙宗中鄉侯緒承
家四德鸞泥旌節媛之間作配三山烏瑞表孝思之
里至其佐餞縱筭之敬饁田舉案之恭執爨采藻之
勤敦葦維桑之譽固無閒言可得而略也方其敝孤
舞影陔撫循蘭奉遺教于書楹誨哲言于績室長君
培根先生山陰作宰廷下聞琴守陶母之廉魚鰾不

饋聽沂州之讞棠芾仍垂次君文石先生養素邱泉
考槃適軸偕居縣上曾無一馬之田徙宅江陵豈有
千奴之樹夫何兩君相繼早逝獨遺二孤長曰喬蔭
少曰樹蕃柳園春覽奉輿之嗣已非葦澤冬榮繞膝
之孫尚幼而太安人備通書籍雅善文章傳書二十
九篇同于伏女成誦四千餘卷陋彼文姬故能三徙
心殷六經口授不煩師法已就名通昔之白燭裁詩
素紉製句簪花字雅賦茗詞工亦有才華未聞講授
以今方古夫何足云歲旅敦牂月躔鶉尾律平九則
序冠三秋溯設悅于芳辰式稱觥于綺席發華一宿

流輝璿極之旁蟠實千枝長秀金池之側加以少君
新持玉尺出掌冰衡門羅吐鳳之才座致握蛇之彥
葭莩戚誼旣歌燕喜之詩桃李諸生將拜宣文之幔
八十年之算介眉壽于今茲五百歲之春佇修齡于
異日

爲王尚書撰姚母方太恭人七十壽序

桐城方太恭人余門生施南府知府姚君之壽母也
婦言婦德善心善容櫛縱順于君姑衿褻奉于民母
玉筐覆燕則春月條桑金鎖吟蛩則秋風漚苧自三
商聽漏季蘭襄中饋之儀及九寡悲絲汎柏矢賢姬

之志南金鑄節朔雪湔衷嵇康之子十年范滂之傳一卷熊九授讀螢幌傳經絮羹規誨于髫齡斷織殷勤于勸學梓喬小杖旣慈而嚴榎楚收威以師爲母傳言義方之訓易云苦節之貞唯太恭人有焉歲庚午姚君領鄉薦越五年余奉

詔遴國子學正若干人姚君與焉署年漢郡古曰孝廉訓胄周庠世稱清秩頃之登辛已進士第遂自靖原縣令歷任今官

鸞誥九重魚軒五命貝邑無諍筮之俗沂州有列墮之詞曼倩行春平反某某子真問夜練緼家家識者

咸謂姚君百里專城三郡聯最士誦捐駒之愛人懷
掛服之慈皆太恭人訓成之者也今太恭人春秋七
十矣鶴齡未老鯢齒方強介眉壽于堂前繞耳孫于
膝下舞萱階之綵服太守衣緋釀菊水之華觴仙人
酒綠其德如彼其福如此蓋自當代鉅公薄海彥士
莫不有載美之什善頌之章余故樂爲之序焉爾

爲朱榆圃姊夫撰蓬萊縣知縣吳君人驥堂上

雙壽序

僕牧堯移轅宅嵎秉節凡百令長首識蓬萊問靈禽
于枳棘之栖廉駟羽于中牟之斲牛刀作譽溢我並

歌魚釜來塵表茲銅墨條其政最東齊之寮案無雙
謀其宗華西漢之治平第一每謂太中恭謹生男著
石相之祠韋逞名通有母善周官之學賢如吳君其
必有自者也乃知芝房九秀並蔭靈根松徑三條相
尋碩隱霄川春艷舊題南郭之廬清滢冬溫新築西
豪之里平生幕府紅近池蓉奏記文章青餘鏤管數
名嚴挺五侯重其標棧歸傲景鸞七部周其履屐而
況梁春有耦萊畚相將夫人本杯斛之賢仲子尚辟
纒之義筠簌記艸屬安定之禮宗荻障徽言授王融
之書學是以君家養炬此日龍衡入洛市而槐垂過

河陽而花發惠班隨子卽述賦于東征張孟遷階方
上壽于北第三心五噎丙丁之極曜相輝二首六身
甲子之朔籌尚少斯則瀛洲金棖長生之藥何窮壺
嶠芸蓬扶老之枝自長僕今者杜陵男子江湖長翁
已除故吏之嫌曾附同官之雅宜成醪白願侑春觴
易縣泥青愧留冬愛晉卿善禱周史贈言汝墳一章
海隅千里春花鶯亂秋水鱸肥岫桂招人陔蘭戒養
有懷遠道重霄望鳬之飛歸去鄉園百歲介鳩筇
之祉

欽頒文廟鐫鐘恭記

臣聞洒光舊制遠記軒皇追蠡遺規近稽姒后鏞棧
名于爾雅鐘鐻列于周官所以示遐邇五三不相沿
襲清濁十二無相奪倫者焉欽惟

聖天子金聲庠序簫勺區陬立律度之均建中和之
極粵以屠維令歲仲夏良辰地符效靈天苞闡瑞南
金之鑄西江是呈蓋寶棧之出晉京豫章之獻朱室
方斯蔑如也於是覽殷薦于易豫採奏衍于詩那練
咸墨之良工辨甬衡之正式宮懸用備闕里來頒虞
負龍趨模流鯨發銘環鸞鳳之字篆雕蟲鳥之書宏
響函宮絃音穆羽抗六律極六呂節八音行八風雖

復楚殿九龍上林千石未足方其拮隔喻此鏗訇者
已臣趨陪祭菜與聽銅鳴敢陳蠡測之詞竊昧筵撞
之義

駢儷文卷三

書烏巖圖後

李畏吾舍人示廣森烏巖之圖而告曰余隨牒中銓
須留上國乾蔭旣遠離嗟彌搆輒復西風菰菜相憶
巖居南陔蘭艸有懷烏哺圖所由名吾聞其語嗚呼
仕非爲貧士各有志或三日而中臺有十年而東觀
傳丁方貴朱丹嘲揚子之車張甲能先黃白滯王脩
之治而况澎侯馬廐舊館賢人丙相車茵新嗔小吏
投光祿之版恥執公儀沃令尹之卮請辭侍飯古人
之事則旣然已舍人慕嗜退之風秉樂潛之志孰長

伯而可客非文開而何諧同賡承露之吟獨後景風
之典是以葡萄未遣棚棘悲來桑中之宦三年桃子
之心五化斯圖也其以平子應閒夏侯抵疑而寓問
答于鉛黃託家園于油素者乎昔有誦辭家之什解
韋帶而情移捧府檄之文入衡廬而色喜亦有叔褒
賣簪籬下傳恭巨孝推轅傭中將母不以三珪忘其
負米不以萬鍾易其啜菽者舍人於此必有所處也
他日北山之北東海之東賦就枯魚兆成棲鶴閉關
掃軌耕陌懷書有棟依桑無筵折芰丈人安坐豎子
提壺叔慈應門長文載箸爲君歌曰衣與繆與不女

聊與事親養志樂何求與

書周長生先生畫像贊後

右明逸民徐枋所爲周長生先生像贊也先生之孫
屬廣森書以小篆將鐫諸賜祠廣森聞之紀侯大去
春秋善九世之讐豫郡先賢畫像厲百城之俗是以
屬參之行摯則延閣府之也訓品之範樹則鑄金儀
之也昔明祚百六之衰哲皇元二之會薰胥柄國推
燥疇封藏冰愆七月之時飛雹沴正陽之氣故御史
忠毅公青規爭引白簡繩彈以爲魯申勤雨先遠郭
都易京陳災唯歸石顯具瑗獨坐恐危鐘下之儲王

聖交通必覺壽房之兆遂使銀璫戴目金版寒心真
嚴棘于南冠讞飲章于北寺火中鋸斧生殘戴就之
尸殿上縑囊死辨杜根之目先生奔扶棺絮痛哭灰
釘免謫代郵方逋公負十三孤嗣變名姓而當壚廿
首屯歌遁闔門而賣餅卒乃刺草伏闕噬血書衣君
門九重臣心一寸訟彼首惡滌我沈寃不惕于黑頭
爰立之威不奪于白水真人之賄以視陳掾都亭之
下蘇卿芻廩之中發憤枕戈甘心推刃者其所成就
何如哉然後需頭再奏頓首申祈公叔木之有言請
褒文子吳溫舒之論枉乞謚威侯維時莊烈帝念忠

毅公首排客魏發履霜冰至之幾禍較左楊慘乘火
泉寒之始旌大名于讀誅增軌級于書銘雒邑弦歌
舊思王令齊民叢社詔祀樂公今之賜祠所由立也
其後彤雲東聚青蓋南浮謳歌之運已歸虞徵士之
官仍繫晉是則巨游相表堪圖益都之問文德遺蹤
卽配宣明之食緯曰求忠臣必於孝子之門斯其信
與

興朝景翼蘿圖丕遷郊鼎名耆受几才子褰裳而在
三之義彌敦懷二之臣必斥

系言貴主竹史招來嘉忠毅之數猷謫文章之禁忌

然則衡雲令主不兵霍虎之辭河濟頑民且錫將軍之葬潛德光于此日圭爲永于其鄉矣又况舊家帛素異代丹青鬚髮平生冠裳不改頌黃瓊之貌作者中郎寫延篤之形附諸正則墉垣烈士似遊武氏之堂軒牖前良何必竟陵之室後有觀者可以興焉乾隆丁酉九月初五日翰林檢討曲阜孔廣森記

書伯兄集石鼓文詩後

王內史所爲楷法韓侍郎謂之俗書顧猶興嗣千文流傳江左聖教三藏刊鑿關西若雞之跡必聚而嗜之若狐之腋必粹而裘之况乃古文奇字出八體校

定之先彤矢秀弓近二雅委蛇之響將謂中興耆耇
上儷羲娥亦後定于韋韓未前聞于漢晉幽風周雅
喜田駿而同辭甫柏徂松效景山而製句從來述造
不厭規隨安見田車旣好卽吉日並時我馬旣同必
宣王故事而或以蒐岐獵渭遠屬冲人保定武成降
徵文格抑又辨亾新之斗何承天未遇其人說柏寢
之盤李少君詎曾親見然而小生握槩遜此機神公
子銘山輸其傑構五日卅里夫夫之古意猶存射象
爲形遑遑與說文別出大氏筮禽萃澤以及寶雉陳
倉俯仰之閒若斯而已繫余伯仲雅自髫齡肆目于

文符繆署之書留心于金石吉貞之迹方錯與鉉敢
望齊名溯籀窮斯庶將兼曉是以網羅金薤韞璘
華所見鼓文無慮數本武墨輕蟬翼指畫較難或幅
窘雁頭餘行便棄互相檢核始得整完輒以礪角殘
痕春梁毀質一見一否半有半無淹洽蘇公已遺八
九紛紜潘訓空復二三伯兄抒稽古之軼懷衷歷前
之殊讀仍其舊貫綴以新聲將使割截明光尙見翻
鴻之彩祛磨瑕適益形抵鵲之珍思且疊抽才終不
盡凡爲大獵長句四十又爲天子之詩四章又爲君
子之詩三章又爲佳世之詩四章等諸蒼頡四字試

尉律之奇木瓜黃潤七言甄凡將之墜韻

蒼頡凡將蓋皆與急就相

類每爾雅注引蒼頡篇考妣延年文選注引凡將篇黃潤纖美宜製彈知蒼頡以四字爲句凡將以七字爲句漢書藝文志言蒼頡斷六十字爲一章是章各十有五句也傳北地倚撫六藝

直用全文蘇東坡歸去十篇頗多賸字校斯難易夫何足云第有一端附諸千慮作書之道取局爲先經始徹終因形起法故有生上生下之意讓左讓右之宜勢相倚而非敲行相躡而非贅左氏簡才八篆寧可續鳧周家策或百名非容斷鶴今乃移甲就乙將絲綜麻雖學僮誦習箝口忘艱恐豪翰縱橫根心失妙是則集右軍帖者於此與有譏焉效前人爲之誰

任執其咎矣

元武宗論

臣讀元史至于武宗以後家難疊興數年之間八更其主蓋天之亾元久矣百里之侮闔于兄弟干戈之憂動于蕭牆二世帝秦咸阿知其煬燼八王柄晉伊洛所由榛曠自古爲然其迹可按也武宗疏壤子于駝紐之封進太弟于龍樓之位亦可謂難能已而仁宗遠昧遵海之風近忘祝食之德與夷猶在詔羣臣而奉馮季子雖賢事王僚而心憾遂使南坡一變鉞刃交于帷宮北地諸藩訊鼎亂于牒屬始則私其神

器卒乃戕其愛胄悲夫旣而泰定革緒曲律遺儲五
遷之運復歸陽甲三讓之事將佇橫庚而又謀之不
類兆其必爭使者南北交馳軫獵之徵天王東西待
問乾祭之衆內有奧主外有長君申孫射而桓已當
齊蒐裘營而隱猶攝魯豈有襄鐘入賂髡頑能不自
疑楚璧可干嘗敖信其久據者哉昔永平雜席趙憙
橫劒鄢陵問璽賈逵正色所以慎名于玉几之辰循
卞子綴衣之側故其臣有定策總已之功而其君無
舉棋勝耦之患彼元人者以馬上治天下用法律爲
詩書不觀于前軌之中失不察于來軫之逆順年年

坐靜仍促烏號歲歲上都易危魚服積其禍敗乃至
于此不然則至元後元兄子猶子謂宜崇明考以讓
王之燬假文宗以乘石之名善繼人志諱內大惡何
至幽厲之主流戶外而忽諸長信之尊誓隧中而不
恤豈非四維滅亾六典缺絕之效與嗟乎國之將亾
非一手一足之烈也亂之旣生非一朝一夕之故也
流濁者澄其源影枉者正其表職此之咎武宗基之
已向使至大御宸周王監國立適立長人謀鬼謀終
鮮叔武捉髮之嫌兼絕永熙斧燭之覬雖或順孫不
肖繼體宜君而張許諸賢猶可同日而治世成遺澤

必不三傳而斬明矣古之王者因時以制禮慮難以
立經承顓九世非襲若水之降居薦益七年不慕陽
城之謳獄一生一及廢質家親親之法三昭三穆明
文家貴貴之典所謂設妃如廟樹子如社重齒路之
防定逐鹿之分消闕競于未萌期憲章于可久不幸
中葉震業大寶陸沈猶當上鑒夷吾唯卜貳圉下徵
靈武卽禪宗儲則英景之釁肅愍之誅不且可以免
乎故曰春秋之義先大一統君而二統未有不亂者
也

轉連珠九首

僕聞哲后首出同聲相應危邦不居蜚遽所利然而
巢箕洗耳非無雍熙之時比干剖心不渝靖獻之志
僕聞傾蓋之義盟于車笠斷金之利鑄于盤盂然而
朱叔有絕交之論翟公有勒門之書

僕聞任浮于力覆餗戒凶望屬于難當車則訥然而
太形王屋愚公之山或移鍼鈞蘭綸盈車之魚可釣
僕聞寓目于遠雖察猶疎近取諸身雖微則炳然而
玉衡旣正以齊日月之行金鏡誠懸不見肩背之影
僕聞水火異行位兌離于睽革陰陽從類契鑒燧于
義娥然而高燭燭天或生于臨邛之井陰火沸海不

滅于陽侯之波

僕聞陽焰朝焚玉石毀質陰冰冬肅江海凝澌然而
員嶠之蠶寒霜覆其尺繭火林之布炎威浣其寸絲
僕聞志士踐言不輟節于風雨匹夫成仁必蹈義于
水火然而橋下之信謬于尾生井中之救愚于子我
僕聞魚鹽之利非賢隱所尚衡門之下非弓車所遺
然而奚戚飯牛而名顯歆郗潛龍而志睽
僕聞善惡將至可以前知吉凶先見不俟終日然而
塞上之叟失馬何尤車下之民孕子非吉

林編修誄

維乾隆丙申秋九月初六日

清故承德郎翰林編修侯官林君卒嗚呼哀哉昔赤
靈佐命遠疏平棘之封綠錯傳經高議石渠之上國
乘光于領聞家諜襲于綿世父諱其茂山陰縣知縣
桃街清禁棠政流美君以支子爲叔父嗣禮也小男
彭祖繼張侯之封後子伏恭世齊詩之學君諱澍蕃
字于宣羈貫夙成岐嶷早異馬客卿六歲酬賓黃子
琰七齡對日百畝垂蔭擢潭根之初莖九里被潤導
靈河之枝詩中學心聽上智目成稷嗣粦人潁川涉
獵纒橐百氏之說斧藻六朝之文旣志勵緯蕭亦藝

勤緝柳歲乙酉鄉舉中式辛卯成進士廣森與同榜
焉君蓋逾方朔獻書之歲僕初履叔皮著論之年三
齒以長執敬雁行六載同官趨陪鵷序因共朝夕逮
觀終始君動爲善棟禮用闕郵四徹中繩三維若矩
言有壇宇而未嘗臧否于人行有防表而未嘗踳跂
爲義嗟乎豈無百鷺譤譤者斯希亦有五錐銛銛者
必挫偶影難獨衆和易同亭伯階高日倒通侯之履
君卿門小雨霑從者之衣而君恥彼造緇戒于奪赤
翹材之館自絕芝帷修刺之家未餐蔥蕘所謂招之
不來麾之不去當求之于古人鮮遇之于今日者也

甲午秋試奉

詔爲浙江副考官一封軺傳八月輜軒回選儒臣誰
差多士君提衡允望砥節首公竿牘不行苞苴無謁
耕柱游楚遺金必却正禮在梁餉錢爲怒是以陸賈
南使未有千金之裝貢禹西征先賣百畝之產介性
至已端操異已君室如懸磬家唯祗裊董少平之傲
車揚子雲之儋石貧豈非病憂能傷人重以洗馬神
清侍中體弱自分職三閣典司四部編削旣勤員程
無曠心深力淺簪短帶長遂嬰戚于伊年卒沈縣于
美疢三門九宅兼違築蓋之凶

林君寓宅於九宮法
開絕命門同年蔣考

功嘗言之君不信也五苦六辛莫覘劇易之效至于眠繭啟足

之際屬統聽息之辰清明在躬平度無改發言不及
于先令內顧靡戀于妻子死生有命不其達與然而
少婦零青高堂戴白遺孤在腹難卜爲熊羆女扶牀
未占射雀中郎有琰雖家緒之可傳當戶生陵庶將
軍之有後情濶不竭遺恨終多溫序死而魂欲歸荀
偃沒而目猶視嗚呼哀哉廣森與君居嘗連塹行亦
離載志協壘箴言投水石三年之字未滅于裏裏九
言之贈猶存于巾篋而永辭官牒遽執鬼中獲人亡
而輟斤鍾子逝而息引寢門之哭於禮斯宜宿草之

慟非子誰爲况君本羈孤柩將歸葬丹旌一去白雲
千里寄縑二匹空慕子往哲過車三步有待于他年
尤離合之殊感朋友之極艱也禮諡以易名誄以表
行爵非有諡諫何作焉然文中貞節肯簡有私諡之
法孝若仲武黃門多述哀之詞敢援斯義而爲之諫
曰

金甌北轉玉衡西遷小榆兆節長柳占愆芳薰委秀
朗璞摧堅嗟我良執值此凋年嗚呼哀哉貧瘁爾躬
宦勞爾心南瞻孝永北出憂深偏枯倍劑嫺寔何斟
懷才怛化齋志湮沈嗚呼哀哉美製舉華殊裁韞櫜

一曙云亾十典誰續聽笛嵇鄰鳴琴阮曲繼杖含悲
宋寮隕哭嗚呼哀哉牀塵鼠迹庭絕驢鳴誼親羊左
痛感殤彭仰念民母旁瞻俊兄魂歸閩海形滯燕城
嗚呼哀哉道布垂筵固車在砌京兆新阡西州舊第
遺像窈冥精靈髣髴楚挽流聲蘭交洵涕嗚呼哀哉
存亾隔世哀樂中年孰愚而壽孰夭而賢天道如此
予復何言于宣逝矣逝矣于宣嗚呼哀哉

洪舍人誄

維乾隆四十有四年夏五月戊申候補內閣中書欵
縣洪君榜卒嗚呼痛哉廣森與君伯兄以重光之紀

單闕之年九州聯李絳之情兩郡同世公之歲從容
見語曰實慚法護幸宴春關惜我阿彌仍艱夏課乃
知盤洲之鵠序復有小隱之鴻詞始緣喜以攀康遂
許安而交秀不披雲霧詎自厭其雌黃旣飲醇醪能
無醉于情素燧木周迴砂金號載僕以病移起後中
秘重紬君亦鄉貢稱前義年再署時則清漳夾宅周
北張南吳下說經嚙朝苞晚每樂安燭夜僧孺燈晨
雪霽尋達風清憶許無不拈奇和險追詞于笠澤之
交侔色揣稱借翰于忘憂之客又或彌天索偶擲地
評聲爲一字以求師犯三章而商略左僖賦蜀橐成

而更削飛九南郡推袁韻足而立增寫句亾何梁尚
書奇君以笏記之才致君以欽賢之館由是一重闔
堵邈隔相思千萬買鄰末由我卽矣然猶邀隙相過
載疑就析問籩答豆詰苦對甘紛落麈于盤中聽彌
前席綏承蚪于箭下行復後門豈意僕遽凶寧君尋
異化遲秣陵之答坐戚天倫求封禪之書奄從地市
者耶君雖獻河東之賦動

宇下之知策名于黃紙之銓致身于紫薇之省而長
纓禁綏短帶昌披野服依然仕心何有譬之蘭生畹
曲非爲人芳蓬在麻中不因扶直汝南攬轡空有志

于澄清山北馳烟竟無關于騰誚僕嘗贈詩云四至
九卿非宦巧一膺三命惜歸遲蓋君之志也早歲雕
蟲體鄰抄撰中身剖易理貫圓神方君屬綴清言悟
苦縣猶龍之學正僕追尋墜緒辨端門化鳥之經共
勗名山互爲他石君體尤弱君業尤勤目不停觀掌
恒自淬豈病餘長度竟論猶堪恐夢裏文通才多亦
盡卒使陸機奧講鬼相遇于尸鄉李廣勞心神或辭
其臧宇逮朝散之文窮火地方罷六揮較中郎之興
感金天僅加三歲嗚呼痛哉君任姍之行多在閭書
孝弟之風別存庭誥將欲稱其官閥則西山挂頰本

厭馬曹將欲悉其生平則南部同閨恨非狗監是以
低徊誰昔聚散如斯對酒當騷遡風將淚云爾系以
誄曰

嗟余涼踽終鮮樂羣惟林編修與君弟舅味同桴杓
聲合筵壘玉樹先埋瓊芝又焚孰終畢牖孰旅燕雲
辨琴之女泣硯之孫較斯兩勝慰爾單魂倘同桑戶
便欲歌門忽復念之涕綆縻紛昔編修逝我飯鑿巾
今承某實隔吟殊垠一登隴首三閱疆遠原齡易奪
岱過難聞儒臬不作聖譯無文鶴鼓流朝烏繖垂昏
三尺之物丈五之墳千年草宿萬古蘭薰

林氏子哀辭

予友林編修亾後匝月而其子永健生生二十四日而夭嗚呼鄭小同之紹業望絕今辰南孺子之生男悲深昔事林君學成士範行爲世表不永其年復替其後天道無知斯非信歟方其室中飛練門左張弧庭角殊凡覃訐載路謂宜枌榆得銑桑樹藏鰥辨楊梅于鞞佩之年擬榛戟于瑯車之歲豈謂瓦棺遽斂金瓠同嗟違寡母于縈抱從嚴君子泉穴二旬嬰鬼未識軒渠三日咳名僅書赴告悲夫是子弱喪誰還羸博之封有女慙遺空銘項伯之柳以是思哀哀可

知己乃爲辭曰

生何值兮斯世長太息兮人事旣永睽兮清交復短
折兮遺嗣前悲兮未緝後感兮仍集屑涕兮萑蘭摧
懷兮於邑福兮禍所因喜兮憂爲鄰名鄭孫兮丁卯
瘞潘子兮甲辰嗟生命兮何促曾未更兮晦朔殤易
月兮有盡哀終古兮相續轉緘兮委階營魂兮弱骸
昨喧泣兮猶聞今雍樹兮長乖謂苗生兮不秀謂蘭
苗兮靡茂石樓兮少女空城兮寡婦風泠泠兮襲帷
雪濂濂兮承霑曾積善兮非慶終理冥冥兮不可窮
呼三閭兮問九重慟何爲兮萃爾躬

爲己丑進士撰祭石顯菴處士文

仰惟萬石訓恭五傳共睦徂徠松柏自開隱士之廬
京洛芙蓉別有神仙之館遂復承家榆社運佐興期
衍胄瓜宗世生俊彥高陽表邑四方式才子之門德
宿聯輝百里見賢人之聚先生岐嶷幼挺趙趨羣超
瓊照彩于崑林竹浮筠于鄧植孝言無閒友篤因心
白水澄懷素絲練節國爵全而屏貴天真樂而遺榮
和嶠千丈之松不足以喻其高黃憲千頃之陂不足
以方其度九流兼洞六籍旁該讀科斗之書已搜奇
于楚簡辨豹文之雅應訪對于雲臺以及六觚正律

之方五雀平衡之術事關游藝總制清衷文握槩以
立成詩緣情而不靡山中招隱非無叢桂之篇衡下
棲遲卽製河魴之句重以芝蘭植砌詩禮趨庭三語
藏楹晏大夫之家俗一經勸學韋丞相之遺詩故能
重奕揚聲五長並秀鵷鸞接翼羔雁成羣者也嗟乎
天不憖遺善無積慶賈占鵬鳥鄭識龍蛇巽嶺冬嚴
珠彩晦少微之色豐鐘霜急金樞頽小華之峯斯則
梁木摧柯因之涕隕石棠留蔭所以悲來某等忝種
新坡空聞舊德臨淮都養遂莫與于談經董相門人
終無期于識面所冀素靈如在鑒我椒漿丹旒匪遙

顧茲蕪調云爾

爲邑士撰公祭七十一代行聖公文

惟公降乙靈苗生申哲運星衡斗繞嶽履淵襟衍章
縫之裔餘二千年襲襍黻之華今四十祀盤孟繼業
尼顛之瑞樹恒敷鼎粥傳家陪尾之榮瀾不竭方其
遭逢孤露次及沴雷是談魄兎之年甫擬藩羊之歲
陵陽就拜幾掛經而義遠仲寶承茅旣撫珪而感咽
禮成類見時際

巡方叟郊迴

紫蓋之光弧羈儼墨車之覲九賓陪位爭看小子之

侯五尺摳衣雅有成人之度

御東堂而講學巾卷參聞趨左陛以受辭

綸絲特訓是後

皇家禮聖六幸平鄉胄子橫經重疏壁水入聆昕鼓
湛堯酒于晞陽每迓

鸞旂奉

文言于倬漢答

宸章而益勵學禮學詩緬先緒以能兼公才公望自
膺七鬯式敬蒸祠豆靜籩嘉粢和酒栗其禮肅肅其
樂雝雝吳季觀而忘言史相謁而稱美興懷追遠更

營望墓之壇建議崇賢改列浩生之祀遂使松欒舊
隴並秩來歆杞柳邪辭不誣吾黨此則嗣服有聲匪
直紹衣無替者也將謂久承

朝渥永樹宗型衛武耄而興箴魯釐賢而燕喜過江
一石何傷僕射之神賜米七年克展曾孫之養然而
高齡未艾噩夢伊槐去有子之旣祥竟和嶠而死孝
方致

九重之上覽表悽然四海之人瞻碑淚下而况環居
百雉之間浸潤九里之內以言載德德何窮矣以言
敘哀哀何終矣秋飈兮淒淒秋霜兮愴愴陳兮桂

酒仿見兮蘭旗

祭程吏部

晉芳

繼配汪宜人文

嗚呼滄溟東望桑已成田翠水西瞻桃無留核金波
隕桂玉井凋榆鸞夜舞于簫中雉朝飛于陌上若夫
瓊瑤淑範藻荇嘉儀女誠七篇姆教三月肇絲有則
歸淮左之名宗笥屐維行著汝南之卓懿時則度遼
書記本出新人文靖芝蘭已非因母而忝離不怨詩魯
說蘆絮何嫌載均鳩養之慈親執雁行之禮徽弦在
御靜好于中閨渚汜同流覃仁于下秩重以君游好
施伯起遺清盈紉何常今昔乍異衛大夫之入室未

免交摧王京兆之臥衣能無對泣乃復簪蒿志苦障
荻心甘折勝留賓易胥更責春桑秋苧勤杼織以移
眠鄕絡秦篝質箱簾而續食固已持鳧執佩高彼風
人挽鹿提罌方茲賢媛又豈特茗茶一賦令輝服其
多能柳絮七言道韞稱其理遣而已曾聞積善車耳
有徵詎忽嬰屯玉箱無術文姬拂素尚餘翡翠之牀
中婦流黃遂罷鴛鴦之製鑑昏菱葉塵竟桃笙佇舒
月于方連虛箕風于曲幌所痛蔡郎有女白傅無兒
撫滯岳之牀垂千秋重感會王龔之帳下並枕何人
此則錦瑟華年每流連于短咏帷屏遺挂益慘愴于

長言者也某等交呂情多弔莊禮在用哀舊德代述
新哀雖婦儀無出閭之言庶女型有貽管之式

辛卯進士祭座主莊侍郎太夫人文

嗚呼瑤琚淑德冠冕名門性婉言容教嫻箴監錄芬
載毓江南推七葉之宗穎黼來歸海東有萬石之嫗
傳書家令學誠高陽緝藻清風綢繆于大雅裁椒元
日怡悵于詩人聽鶉鵲麻聞鵬濩葛采青蘩于南澗
流翠蓉于西洲禮盡威姑敬瞻賓友盧里題其孝德
冀畦式其徽音雖復取彼無儀戒于攸遂而閨門師
鍾郝之風都人表尹吉之度固當貽彤中壘假素武

興者已旣而罹遘經絲憂深卹緯振貞蕤于幽谷揚
喬葉于清江遂乃勵志九熊傳恭羞驚授崔寔之書
記謹魏緝之交游致我夫子暨學士本存先生旻昉
荷規徙居秉訓祭酒橫經之講日下無雙議郎對策
之文殿中第一文軒丹轂遣彼前榮祿服圭衣光我
嬪則然而文伯之家非無主績尚書之母或復親春
三斛之廩無贏一坩之饋必却迨我夫子秩司三祉
階洊貳卿每念尸饔匪忘來諭李膺入蜀無志于之
官潘岳閒居將期于歌事而太夫人勗之移孝未許
少傳之歸勉以在公不就司農之養頓嬰六沴空謁

三醫方當馮母入殿之年未逾武昌拜命之歲恒貞
遽歿坤範仍淪紺雪樛條遂隕蓬壺之簪青霜凋節
莫留疏圃之棠嗚呼痛哉某等曾趨鱣座竊附龍門
白虎觀前伏受漢書之義絳紗幔側與傳周禮之經
懿範徽言夙聞少二祖音往德益感在三昉彷彿于
瓊儀永流連于珩佩

爲人撰祭張母吳太孺人文

乾隆丁酉之歲仲春之月二十有二日戊午是爲
敕封太孺人張母吳太孺人屬纊之周月具官某等
始以清酌庶羞奠於靈位前曰嗚呼痛流環海一時

簪白柰之花悲感長年並日落青林之葉仰罹

國恤俯切家艱朝夕殷事既稽于禮經日月公除方
伸于私奠恭惟太孺人毓德素里作嬪清門州來遺
讓麟簡韞于遐年忠孝衍宗鵲印銘于瑞宇勗帥以
敬有善莫名靜御瑟于雞晨謹咸縱于鴉旦接余左
右稱其禮也戴紵下上見其勤也闔門之語蓋其恭
也要襪之衣抑其儉也嗟乎陔華義缺韓棣刺興一
尺之布可縫百里之侮易園而况嗣西華之後宗絕
于孔懷傳光祿之詩恩殊于鞠我婦或私其區蓋親
孰生于室中曾乏繆彤閉戶之撻寧慕張堪讓產之

德而乃戒哲言于樞機之內賦諫詩于宵肆之辰並
事兩堂克和羣季影響如聞于女憲言容必稱于君
姑以及總扈爲壘吉笄折首禮雖窮于貳斬情猶重
于再周孟氏三鼎之饌厚薄何疑子柳四布之歸兄
弟畢及太孺人旣賢且孝斯其大端歟豈謂積勞構
疾福善無徵短綆遄侵長繩不繫一膺

紫渙六變青暄嗟耄缶于丁年逝仙輶于甲夜感菴
藺之草益母空名樹襟背之花銷憂無術某等並儕
同歲或附爲寮拜元伯之庭幃受義成之書記若九
若七嬪儀莫罄于書方無二無雙壺範恒流于燁管

駢儷文卷三終

嘉慶壬申仲冬男昭虔恭校

後序

乾隆丙午冬外大父喪歸自杭將卜厥窆十有一月
舅氏鄭軒先生卒春秋三十有五嗚呼袁公徂謝尚
羈南越之魂羊子行吟載隕鹵州之哭倏焉得耗誅
愧無文遂繾綣以彌年致愴懷於宿草念鄭鄉千載
允有傳人悟遷史一隅願言軼事矧七篇之藁儼存
其圭臬百行之札猶置之懷裏匪予小子其誰測先
生矣乎先生諱廣森字衆仲別字鄭軒父諱繼汾昔
辭臚仕謝甘泉之車晚定遺經輯密山之簡先生其
第三子衍聖公諱傳鐸之孫也通詹早異秀骨特殊

偉初步於龍文襲竒微於麇紱蓋珣玕之美聖神之
童放古而準厥聲靡忝焉嘗受書於東原姬傳兩君
子之門壇宇景開智力響赴司農禮器何掾膏肓萃
案斷之專家造儒林之絕學紅休之畧旣通綠錯之
文咸究至於方聞廸躋重差夕桀之章宮體裁牋典
冊高文之譽年十七中戊子科舉人辛卯成進士官
檢討丁酉有許太夫人憂機乍斷而長悲簪一抽而
終決堂築儀鄭志惟傳經先生自此遠矣方先生之
在翰林也英英如雲介介若石當令甲編排之歲仍
傅丁聳峙之年僂指翹材爭入次卿之館脅肩昧爽

怕汚丙相之茵乃能宴處衡廬恪循位箸洎乎賓興
多士選校儒臣惟恐濫以弱齡膺茲華節任衆竿之
競吹聊獨絃之輟奏焉嗟乎敢辭榮祿而謙非易盈
亦解和同而堅爲難奪良所云斧藻其德隱括其行
蓊蓊不緇隆隆恐墜者已龍蛇紀歲賢人並嗟有王
母之喪負孝孫之慟家屯旣構外侮孔棘蕭條總帷
方在堂室平反讞牘迄更時序維南有山喬蔭暫徙
窮北已雪庭花弗榮故乃溯江淮走河洛奉版輿者
百舍質田券者十雙雨濡衣蓋暴日旋乾夢接衾牀
見星又作羸體善病清神易傷况復日不再中貫窮

九變火焚莫敢山有玉而先摧霜肅非時草拔心而
亦死長沙之舍獨感鵬來通德之門半塵鼠跡此勞
人所同慨尤生民之極艱雖然晝夜之期哲人所罔
戀淹速之度上士所不疑而或者徒以命不副才官
嗇於遇爲斯人惜抑又末矣昔也安石歸山陽元在
宅留每踰月坐輒忘晷綈槩玩其英華礪砥叨其攻
錯祇以青谿偶字偏契言提寶樹聯聲粗諳體要人
琴頓絕馬策空搥記小同共食之時先生已幸有子
擬中郎無愧之作後死忍與斯文

贊曰桓桓雙闕有此世家其生也戚蓬折夫麻白華

篇亡書爲我勵葛蕭詩存莫之已庇百行斯融一經
維則以我溝猶逮承蠹沒獲人久亡奚而運斤酌彼
重泉曰質先民

乾隆五十有二年歲在彊圉協洽新安甥朱文翰撰